

全唐诗卷三百三十四

卷 334_1

【夏至日衡阳郡斋书怀】令狐楚

一来江城守，七见江月圆。
齿发将六十，乡关越三千。
褰帷罕游观，闭阁多沉眠。
新节还复至，故交尽相捐。
何时狎闾阖，上诉高高天。

卷 334_2

【八月十七日夜书怀】令狐楚

三五既不留，二八又还过。
金蟾著未出，玉树悲稍破。
谁向西园游，空归北堂卧。
佳期信难得，永夕无可奈。
抚枕独高歌，烦君为予和。

卷 334_3

【九日言怀】令狐楚

二九即重阳，天清野菊黄。
近来逢此日，多是在他乡。
晚色霞千片，秋声雁一行。
不能高处望，恐断老人肠。



卷 334_4

【和寄窦七中丞】令狐楚

仙吏秦峨别，新诗鄂渚来。
才推今北斗，职赋旧三台。
雕镂心偏许，緘封手自开。
何年相赠答，却得到中台。

卷 334_5

【立秋日悲怀】令狐楚

清晓上高台，秋风今日来。
又添新节恨，犹抱故年哀。
泪岂挥能尽，泉终闭不开。
更伤春月过，私服示无缁。

卷 334_6

【秋怀寄钱侍郎】令狐楚

晚岁俱为郡，新秋各异乡。
燕鸿一声叫，郢树尽青苍。

山露侵衣润，江风卷簟凉。
相思如汉水，日夜向浔阳。

卷 334_7

【立秋日】令狐楚

平日本多恨，新秋偏易悲。
燕词如惜别，柳意已呈衰。
事国终无补，还家未有期。
心中旧气味，苦校去年时。

卷 334_8

【赠毛仙翁】令狐楚

宣州浑是上清宫，客有真人貌似童。
绀发垂缨光髣髴，细髯缘颌绿茸茸。
壶中药物梯霞诀，肘后方书缩地功。
既许焚香为弟子，愿教年纪共椿同。

卷 334_9

【游义兴寺寄上李逢吉相公】令狐楚

柳营无事谪莲宫，步步犹疑是梦中。
劳役徒为万夫长，闲游曾与二人同。
凤鸾飞去仙巢在，龙象潜来讲席空。
松下花飞频伫立，一心千里忆梁公。

卷 334_10

【游晋祠上李逢吉相公】令狐楚

不立晋祠三十年，白头重到一凄然。
泉声自昔锵寒玉，草色虽秋耀翠钿。
少壮同游宁有数，尊荣再会便无缘。
相思临水下双泪，寄入并汾向洛川。

卷 334_11

【节度宣武酬乐天梦得】令狐楚

蓬莱仙监客曹郎，曾枉高车客大梁。
见拥旌旄治军旅，知亲笔砚事文章。
愁看柳色悬离恨，忆递花枝助酒狂。
洛下相逢肯相寄，南金璀错玉凄凉。

卷 334_12

【奉和严司空重阳日同崔常侍崔郎及诸公登龙山落帽台佳宴】令狐楚

谢公秋思渺天涯，蜡屐登高为菊花。
贵重近臣光绮席，笑怜从事落乌纱。
萸房暗绽红珠朵，茗碗寒供白露芽。
咏碎龙山归出号，马奔流电妓奔车。

卷 334_13

【立春后言怀招汴州李匡衡推】令狐楚

闲斋夜击唾壶歌，试望夷门奈远何。
每听塞笳离梦断，时窥清鉴旅愁多。
初惊宵漏丁丁促，已觉春风习习和。
海内故人君最老，花开鞭马更相过。

卷 334_14

【奉和仆射相公酬忠武李相公见寄之作】令狐楚

丽藻飞来自相庭，五文相错八音清。
初瞻绮色连霞色，又听金声继玉声。
才出山西文与武，欢从塞北弟兼兄。
白头老尹三川上，双和阳春喜复惊。

卷 334_15

【郡斋左偏栽竹百馀竿炎凉已周青翠不改而为墙垣…之趣】令狐楚

斋居栽竹北窗边，素壁新开映碧鲜。
青蔼近当行药处，绿阴深到卧帷前。
风惊晓叶如闻雨，月过春枝似带烟。
老子忆山心暂缓，退公闲坐对婵娟。

卷 334_16

【省中直夜对雪寄李师素侍郎】令狐楚

密雪纷初降，重城杳未开。
杂花飞烂漫，连蝶舞徘徊。
洒散千株叶，销凝九陌埃。
素华凝粉署，清气绕霜台。
明觉侵窗积，寒知度塞来。
谢家争拟絮，越岭误惊梅。
暗魄微茫照，严飙次第催。
稍封黄竹亚，先集紫兰摧。
孙室临书幌，梁园泛酒杯。
静怀琼树倚，醉忆玉山颓。
翠陌饥乌噪，苍云远雁哀。
此时方夜直，想望意悠哉。

卷 334_17

【南宫夜直宿见李给事封题其所下制敕知奏直…以诗寄】令狐楚

番直同遥夜，严局限几重。
青编书白雀，黄纸降苍龙。
北极丝纶句，东垣翰墨踪。
尚垂玄露点，犹湿紫泥封。
炫眼凝仙烛，驰心袅禁钟。

定应形梦寐，暂似接音容。
玉树春枝动，金樽腊酿醲。
在朝君最旧，休浣许过从。

卷 334_18

【将赴洛下，旅次汉南，献上相公二十兄言怀八韵】令狐楚

台室名曾继，旌门节暂过。
欢情老去少，苦事别离多。
便为开樽俎，应怜出网罗。
百忧今已失，一醉孰知他。
帝德千年日，君恩万里波。
许随黄绮辈，闲唱紫芝歌。
龙袞期重补，梅羹伫再和。
嵩丘来携手，君子意如何。

卷 334_19

【青云干吕】令狐楚

郁郁复纷纷，青霄干吕云。
色令天下见，候向管中分。
远覆无人境，遥彰有德君。
瑞容惊不散，冥感信稀闻。
湛露羞依草，南风耻带薰。
恭惟汉武帝，馀烈尚氛氲。

卷 334_20

【圣明乐】令狐楚

海浪恬月微，边尘静异山。
从今万里外，不复锁萧关。

卷 334_21

【春闺思】令狐楚

戴胜飞晴野，凌澌下浊河。
春风楼上望，谁见泪痕多。

卷 334_22

【宫中乐五首】令狐楚

楚塞金陵靖，巴山玉垒空。
万方无一事，端拱大明宫。
雪霁长杨苑，冰开太液池。
宫中行乐日，天下盛明时。
柳色烟相似，梨花雪不如。
春风真有意，一一丽皇居。
月上宫花静，烟含苑树深。
银台门已闭，仙漏夜沉沉。



九重青琐闼，百尺碧云楼。
明月秋风起，珠帘上玉钩。

卷 334_23

【春游曲三首】令狐楚

晓游临碧殿，日上望春亭。
芳树罗仙仗，晴山展翠屏。
一夜好风吹，新花一万枝。
风前调玉管，花下簇金羁。
阊阖春风起，蓬莱雪水消。
相将折杨柳，争取最长条。

卷 334_24

【远别离二首】令狐楚

杨柳黄金穗，梧桐碧玉枝。
春来消息断，早晚是归期。
玳织鸳鸯履，金装翡翠簪。
畏人相问著，不拟到城南。

卷 334_25

【闺人赠远二首】令狐楚

君行登陇上，妾梦在闺中。
玉箸千行落，银床一半空。
绮席春眠觉，纱窗晓望迷。
朦胧残梦里，犹自在辽西。

卷 334_26

【从军词五首】令狐楚

荒鸡隔水啼，汗马逐风嘶。
终日随征旆，何时罢鼓鼙。
孤心眠夜雪，满眼是秋沙。
万里犹防塞，三年不见家。
却望冰河阔，前登雪岭高。
征人几多在，又拟战临洮。
胡风千里惊，汉月五更明。
纵有还家梦，犹闻出塞声。
暮雪连青海，阴霞覆白山。
可怜班定远，生入玉门关。

卷 334_27

【思君恩】令狐楚

小苑莺歌歇，长门蝶舞多。
眼看春又去，翠辇不经过。

卷 334_28



【王昭君】令狐楚

锦车天外去，毳幕雪中开。
魏阙苍龙远，萧关赤雁哀。

卷 334_29

【发潭州寄李宁常侍】令狐楚

君今侍紫垣，我已堕青天。
委废从兹日，旋归在几年。
心为西靡树，眼是北流泉。
更过长沙去，江风满驿船。

卷 334_30

【李相薨后题断金集（一作裴夷直诗）】令狐楚

一览断金集，载悲埋玉人。
牙弦千古绝，珠泪万行新。

卷 334_31

【年少行四首】令狐楚

少小边州惯放狂，骝骑蕃马射黄羊。
如今年老无筋力，犹倚营门数雁行。
家本清河住五城，须凭弓箭得功名。
等闲飞鞚秋原上，独向寒云试射声。
弓背霞明剑照霜，秋风走马出咸阳。
未收天子河湟地，不拟回头望故乡。
霜满中庭月满楼，金樽玉柱对清秋。
当年称意须行乐，不到天明不肯休。

卷 334_32

【塞下曲二首】令狐楚

雪满衣裳冰满须，晓随飞将伐单于。
平生意气今何在，把得家书泪似珠。
边草萧条塞雁飞，征人南望泪沾衣。
黄尘满面长须战，白发生头未得归。

卷 334_33

【游春词】令狐楚

高楼晓见一花开，便觉春光四面来。
暖日晴云知次第，东风不用更相催。

卷 334_34

【汉苑行】令狐楚

云霞五采浮天阙，梅柳千般夹御沟。
不上黄花南北望，岂知春色满神州。

卷 334_35

【中元日赠张尊师】令狐楚

偶来人世值中元，不献玄都永日闲。
寂寂焚香在仙观，知师遥礼玉京山。

卷 334_36

【赴东都别牡丹】令狐楚

十年不见小庭花，紫萼临开又别家。
上马出门回首望，何时更得到京华。

卷 334_37

【寄礼部刘郎中】令狐楚

一别三年在上京，仙垣终日选群英。
除书每下皆先看，唯有刘郎无姓名。

卷 334_38

【坐中闻思帝乡有感】令狐楚

年年不见帝乡春，白日寻思夜梦频。
上酒忽闻吹此曲，坐中惆怅更何人。

卷 334_39

【春思寄梦得乐天】令狐楚

花满中庭酒满樽，平明独坐到黄昏。
春来诗思偏何处，飞过函关入鼎门。

卷 334_40

【皇城中花园讥刘白赏春不及】令狐楚

五凤楼西花一园，低枝小树尽芳繁。
洛阳才子何曾爱，下马贪趋广运门。

卷 334_41

【相思河】令狐楚

谁把相思号此河，塞垣车马往来多。
只应自古征人泪，洒向空洲作碧波。

卷 334_42

【三月晦日会李员外座中频以老大不醉见讥因有此赠】令狐楚

三月唯残一日春，玉山倾倒白鸥驯。
不辞便学山公醉，花下无人作主人。

卷 334_43

【赋山】令狐楚

山。
耸峻，回环。
沧海上，白云间。

商老深寻，谢公远攀。
岩泉滴滴，幽谷鸟关关。
树岛西连陇塞，猿声南彻荆蛮。
世人只向簪裾老，芳草空馀麋鹿闲。

卷 334_44

【句】令狐楚

何日居三署，终年尾百僚。
（见《定命录》）
移石几回敲废印，开箱何处送新图。
（《春明退朝录》）
唯应四仲祭，使者暂悲嗟。
（《宫人斜》）
偶逢蒲家郎，乃是葛仙客。
行常乘青竹，饥即煮白石。
腰间嫌大组，心内保尺宅。
我愿从之游，深卜炼上液。
（见《锦绣万花谷》）

